

This is not registered version of TotalDocConverter  
Bishbu surʼatda qoʼsib olib berilgan

Toʼqqiz aymoq maqbarasi oʼt ola boshlagani munosabati bilan tunda atrof-muhit va yodgorliklarni muhofaza etish boʼyicha tuzilgan Supershtabning shoshilinch yigʼilishi chiqarildi.

Yigʼilishni Supershtab raisi Moʼmin Itoatovich ochib, moʼb Ttabar idoraning masʼul xodimi sifatida xalq xoʼjaligining barcha sohalarida katta yuksalishlarga erishilayotgani, jumladan shu yilning oʼtgan kvartalida majburiyatini bajarmagan biron ta rarmoq qolmagani haqida bafurja toʼxtalib oʼtdi. Soʼng ayrim shaxslarning loqaydligi natijasida baʼzan xatolar ham uchrab turishidan afsuslanib, bunga misol tariqasida koʼhna Toʼqqiz aymoq maqbarasida yongʼin chiqqani, ayni daqiqalarda alanga tobora avjlanib borayotganini ilova qildi.

Tarix fanlari nomzodi oʼrtoq Oʼsarxoʼjaev oʼz soʼzida Toʼqqiz aymoq maqbarasi jahondagi eng qadimiy yodgorliklardan ekanini bildirib, uni Misr, Rum va Dorussalomdagi afsonaviy inshootlarga taqqosladi. Uning aytishicha, eramizdan ancha avval tiklangan bu maqbara Turondagi bir qancha vayrongarchilik urushlarida el-yurt mehri tufayli omon qolgan. Iskandar Zulqarnaynning (yosh olim oʼz nutqi davomida Iskandarni qandaydir Aleksandr bilan bot-bot adashtirib turdi) bosqinchilik yurishlari chogʼida xalq daryodan kanal qazib kelib, pastqam joyga qurilgan maqbarani suvga bostirib yuborgan. Mazkur usul keyinchalik arablar istilos davrida ham qoʼl keldi.

Oradan koʼp yillar oʼtib, ikki marta suvdan quruq chiqqan Toʼqqiz aymoq boshida yangi xavf paydo boʼldi endi yovuz Chingizzon talonchilar yopirilib kela boshladi. Dushman kent jangchilarini holdan toydirish maqsadida daryoni boʼgʼib qoʼygani sababli, vaziyat qaltisligiga qaramay boʼlak chora oʼylab topilib, maqbara hashar yoʼli bilan tashib keltirilgan qumga koʼmib tashlandi.

Bu bilan shuni aytmoqchimanki, dedi notiq soʼzining oxirida, sara granitdan qurilgan mustahkam maqbara suvda ivib ketmagani, qum ostida uqlananib tushmagani kabi oʼtda ham kuyib kul boʼlmaydi. Binobarin, vahima koʼtarishimiz uchun hech qanday asos yoʼq.

Shundan keyin akademik Burunovskiy soʼz oldi. Oʼrtoq Burunovskiy yosh olimning oxirgi gaplarini toʼliq qoʼllab-quvvatlab, bu boradagi shaxsiy fikrini rad etib boʼlmaydigan dalillar bilan isbotlab berdi.

Har qanday tosh oʼzining fizik xususiyatiga koʼra oʼtga beqiyos darajada bardoshlidir, deb uqtirdi oʼrtoq Burunovskiy, zero bu turkumdagagi jismalar tarkibida yonuvchi moddaning oʼzi yoʼq. Ayniqsa granit oʼta chidamli boʼlib, hatto poʼlat quyuv qozonida ham erimaydi.

Taniqli professor Mansabaliev, arxeologiya sohasidagi yirik mutaxassis Egilman, mashhur arxitektor Xoʼpboʼlarov, "Haromharishstroy" trestining quruvchi injeneri Pultoparov, shahar ijroiya komiteti raisining oʼrinbosari Sansalorov oʼrtoqlar oʼz navbatida akademik Burunovskiyning ilmiy asosdagi mulohazalariga qoʼshilib, ortiqcha bezovtalanishga hojat yoʼq degan xulosaga keldilar. Chunonchi, tarixda toshdan qurilgan turli qasr, ibodatxonalar va madrasalarda yongʼin sodir boʼlish hollari kuzatilgan, solnomachilar bu obʼektlar aytarli zarar koʼrmaganini yozib qoldirishgan.

Fizika fanlari doktori oʼrtoq Otboshev akademik Burunovskiyga hamfikr boʼlish bilan birga, qizib turgan toshning suv sepilishidan parchalanib ketishi mumkinligini, shu bois yongʼinni oʼchirishda ishqorli koʼpikdan foydalanish maqsadga muvofiqligini alohida taʼkidladi.

Yigʼilishda yosh journalist Birkesarov soʼz soʼradi. U oʼz nutqida bir qadar pessimistlikka berilib, maqbaraning markaziy gumbazi ichidagi betakror naqshlar kuchli harorat taʼsirida chatnab tushib, zarhal bitiklarning butunlay erib ketishi xavfi borligidan tashvishlanib gapirdi.

Mabodo, bular nobud boʼlsa, yana asl holiga keltirishimiz amri mahol, dedi u. Vaholanki, Shermat qoʼrboshi bilan "qizillar" oʼrtasida boʼlgan jangda qattiq shikastlangan kungirador soʼppini hanuz qayta tiklay olmayapmiz.

Bularni gapirishdan endi foyda yoʼq, dedi oʼt oʼchiruvchilar rahbari oʼrtoq Narvonov. Naqshlar taqdirini maqbarada turistlarga xizmat koʼrsatuvchi yogʼoch doʼkonchalar rastasi qurilmasdan ilgari oʼylash kerak edi. Hali bunisiyam holva, maqbara ostidagi yertoʼлага qoʼshni avtokorxonaning yonilgʼi ombori joylashtirilgani boshimizni koʼproq qotiryapti.

Oʼrtoq Narvonov soʼzining yakunida oʼt oʼchiruvchilar ish boshlashi uchun Supershtab aʼzolari tezroq biron qarorga kelishlari lozimligini eslatib, ulardan aniq koʼrsatma talab qildi.

Shundan soʼng muzokara qizib ketdi. Ertalabga yaqin kutilmaganda bahsni toʼxtatishga toʼgʼri keldi alanga yertoʼladagi yonilgʼilarga yetib borib, Toʼqqiz aymoqning kuli koʼkka sovurilgani haqida telefonogramma olindi.

Bir necha minut davom etgan nonushtali tanaffusdan keyin Supershtabning eʼtiborli aʼzolari yana dumaloq stol atrofiga toʼplanishdi. Ular kun tartibidagi ikkinchi masala qurib-qaqshab borayotgan Orol dengizini asrab qolish muammosini muhokama etishga kirishdilar...

1987